

東
華
續
錄

東華續錄

同治四十

臣王先謙敬編

臣張式恭恭校

十一月己亥諭內閣前因毛鴻賓等奏率屬捐廉助餉並自陳不敢仰邀議敘朝廷念其因廣東軍需緊要共濟時艱首先報捐銀兩以資倡率尙屬急公加恩將毛鴻賓等交部從優議敘前任學政王澎等所捐銀兩分別移獎子弟以示區別茲據毛鴻賓郭嵩燾奏稱該督撫所得優敘請照學政司道等一體移獎子弟等語該督撫係封疆大吏祿入較豐竟欲與學政司道等官共希恩賞所見甚爲卑陋毛鴻賓郭嵩燾前次所捐銀兩均著卽行發還並撤銷從優議敘中外臣工捐貲助餉給予獎敘自有一定權衡乃該督撫輒以一己私事意存計較曉曉瀆陳殊屬不知大體毛鴻

賓郭嵩燾均著交部議處尋議均降三級調用毋庸查級紀議抵
得旨均著加恩改爲革職留任○諭議政王軍機大臣等會國藩
李鴻章奏請遣撤揚防兵勇節餉解甘等語前因甘省餉需支絀
諭令李鴻章設法籌解茲據會國藩等奏稱江省各屬蹂躪過久
元氣太傷蘇滬釐稅及蘇皖鹽務釐卡等款仍須籌濟江皖兩省
軍食惟揚防一軍可以裁撤卽可騰出江北之餉半濟皖軍半解
甘省所籌尙屬可行見在楚皖一帶賊勢寢衰諒不能肆意北竄
貽害鄰疆揚防一軍自可遣撤以節經費該處見存兵勇共若干
名著富明阿查明將見有馬隊裁汰疲弱揀選精銳派員管帶馳
赴甘省都興阿軍營助剿所有一切勇隊卽著分起安爲遣撤務
須查照屢次裁勇章程嚴加鈐束並分咨該勇原籍各地方官量
爲安插俾安生業富明阿於遣撤兵勇後著卽馳赴江甯接印任

事將整頓旗營撫綏勞來各事宜次第舉行以重職守江北之餉計可騰出若干著會國藩李鴻章查明實在數目以一半分解甘省以濟要需以一半分濟皖軍前敵如甘省待用萬分緊迫卽將此有著之款儘力籌撥不必拘定一半之數並著妥議章程迅速具奏哀下河一帶見在無事該處地方本係該督撫等所轄自應妥籌兼顧以免疏失將此由五百里各諭令知之尋奏統計來年騰出有著之款五萬兩擬按月以三萬兩撥赴甘肅以二萬兩畱供皖軍俟皖軍裁撤卽行併解甘肅報聞○諭僧格林沁國瑞奏投降髮逆酌量遣畱並督軍追剿髮捻竄匪各情形一摺投降人眾經僧格林沁督飭英翰等分別畱營遣散業已就緒辦理甚妥仍著飭令帶兵各員及沿途地方官妥爲彈壓毋任別滋事端其西竄股匪向光山一帶奔逃僧格林沁派令馬德昭陳國瑞等跟

蹤追擊斬殺解散甚眾著僧格林沁國瑞乘此聲威嚴飭馬德昭陳國瑞等軍務將此股逆匪悉數殲除毋任遠竄張之萬前已派令王文行等軍馳赴信陽羅山一帶會合張曜春壽等馬步各隊夾剿竄匪仍著嚴飭各軍分路兜擊互相策應使賊無路可竄即可一鼓殲擒陳大澣張總愚等均係著名首惡見在竄匿何處著僧格林沁張之萬分飭各營探明蹤迹設法購擒毋令免脫其邱元才一股見竄隨州之高城一帶勢漸西趨僧格林沁見已飭張曜督軍緊躡並著官文迅飭西路防軍迎頭截擊力扼竄路楚豫邊界爲賊匪往來熟徑官文張之萬務當督率在事員弁探明賊蹤併力夾擊以收聚殲之效曾國藩昨已有旨令其毋庸赴楚其所派劉連捷李鶴章劉銘傳等軍已令其馳赴黃州德安等處剿賊著官文酌量情形分別調遣以資得力將此由六百里各諭令

知之○諭毛鴻賓郭嵩燾奏擊退各股逆匪見籌防剿情形並請調鮑超剿除閩粵髮匪及廣東見辦釐金情形各摺片粵中敗賊竄擾福建漳州所屬漳逆汪海洋復竄踞汀屬之武平游騎四出侵入粵境既經吳贊誠方耀等截剿獲勝而東路情形仍屬喫緊毛鴻賓等見檄方耀帶勇四千名由嘉應繞赴閩境會軍兜擊並令翟國彥鄭紹忠唐啟蔭任星元等分防要隘李福泰督兵策應所籌尙合機宜卽著督飭派出各軍實力防剿毋稍疏虞鮑超已經賞假回籍葬親其所部之軍前已有旨令宋國永婁雲慶分統其眾入閩援剿歸左宗棠調遣宋國永等皆係勇敢善戰之員再得左宗棠發縱指示必能會合閩軍痛掃賊氛毛鴻賓等惟當嚴飭方耀迅速赴閩合力夾擊將此股餘孽悉數殲除毋畱後患所陳粵東釐金大概情形覽奏均悉該督撫等總當認真籌辦務令

商民相安不至擾累而又能杜絕中飽之弊方足以收實效而免

怨讟將此由五百里各諭令知之○允李鴻章請建昭忠祠於無

錫惠泉山祀江南陣亡將士○以桂清爲盛京工部侍郎

由內閣學士遷

○庚子諭內閣前因烏魯木齊都統平瑞在迪化州全家殉難當

經諭令該旗查明該故員是否另有子嗣在京奏明請旨茲據正

黃旗滿洲都統恭親王等奏稱該故員京中別無子嗣本族公議

願將該故員之胞姪桂明繼與平瑞承祧經戶部覈與定例相符

准其承繼查明請旨等語太醫院學習醫士護軍桂明既經繼與

平瑞爲嗣著俟百日孝滿後由該旗帶領引見○諭議政王軍機

大臣等都興阿奏親赴前敵仍擬合兵會剿先通北路穆圖善奏

甯靈軍務緊急勢難分兵出關各一摺前因都興阿等奏穆圖善

所部太單難以獨攻一路必須合兵先攻甯夏諭令穆圖善俟甯

夏克復後再行整兵出關見在都興阿業已馳往寶豐親赴前敵
穆圖善督率後隊陸續由草地進發渡河而西相機勦辦所籌均
尙周妥卽著該署督等嚴檄諸軍認真掃蕩節節進逼務將甯夏
靈州力圖規復迅殄逆氛穆圖善暫時不能出關惟當懷遵前
旨會合杜嘎爾等軍奮勉圖功恢復名城疏通北路俟甘肅軍務
辦有眉目兵力稍厚卽可移師出關以資攻勦將此由六百里各
諭令知之○壬寅諭議政王軍機大臣等恩麟奏河州鎮城被陷
稟報兩歧雷正綰攻克蓮花城陶茂林馳赴河州暨憑陳西甯回
匪漢番人等解散未可深信並道員雅爾佳納查辦事件未能妥
協各摺片馬也氏等既在河州開導回眾何以州城猝然被陷可
見該回婦辦理情形未可深恃前諭陶茂林一軍迅解靜甯之圍
馳赴省垣布置安帖卽解河州之圍收復狄道見在河州被陷軍

情尤爲緊要該提督行抵何處著懷遵前旨飛速前進督飭所部各營並趙必達等見存各兵勇奮力進攻將河州狄道次第克復河州文武稟報與難民供詞歧異並著陶茂林恩麟詳查確情具奏千總魏智勇等糾黨開城情殊可惡著查拏訊明盡法懲治西甯回漢既稱永息紛爭何以回撒仍復焚搶其獷悍情狀非大加懲創不足以儆其兇頑惟甘省兵力未集不敷征勦著玉通暫示羈縻妥爲撫輯俟河州收復後卽著陶茂林乘得勝之勢鼓行而西斟酌勦撫則操縱在我易於見功並著都興阿穆圖善雷正綰酌量軍情如有可分之兵卽行抽發前往西甯以資鎮攝恩麟奏稱西甯一事並未完結文武員弁亟圖立功懇憑玉通早爲出奏見在給予翎支者已不下數百人等語朝廷旌功之典豈容濫邀是否實有其事著玉通據實覆奏不准稍存欺飾該處回匪鳴張

日甚一切軍情著恩麟玉通隨時和衷商辦不得各存意見致滋貽誤道員雅爾佳納於奉委事件未能妥籌辦理並與玉通各執意見互相爭持實屬不能得力卽著恩麟查明參辦將此由六百里諭知都興阿穆圖善雷正綰玉通並傳諭陶茂林恩麟知之○廣江蘇鄉試中額一名江西瑞州府學額六名星子縣七名上高四名新昌三名○癸卯諭內閣沈葆楨奏遵查節年民欠及因災緩徵帶徵銀米等項數目開單懇請豁免一摺江西省節年民欠及軍欠商欠各項銀兩旣據該撫查明均係實欠在民並無絲毫隱混自應悉予豁免以清庫款而裕民生加恩著照所請所有單開之民欠地屯丁耗入官田租商稅贏餘驛站節省等銀五百三十二萬七千八百七十兩零本色物料銀二萬二千三百十八兩零地丁腳耗銀七萬五千三百九十二兩零折色物料銀二十三

萬三千五十一兩零牛牙當稅銀三萬六千六百三十七兩零釐
課正耗銀六千六百五十三兩零濠租銀三千四百九十五兩零
地稅銀三千四百六十四兩零鐵稅銀一萬九千三百四十二兩
零官山田地湖洲等租利息銀四千一百九十一兩零救生田租
銀二千三百七十二兩零入官田畝租穀二千九十七石零正耗
漕米二百三十萬三千八百十三石零兵米五萬四千三十六石
零隨漕屯糧米折正耗銀五十一萬二千五百六十七兩零兵折
正耗節省米價回疆天津改折回疆天津等銀二十一萬二千七
百四十五兩零漕糧腳耗銀十七萬四千一百九兩零兵加銀五
萬一千四百七十三兩零暨軍欠之餘租銀二十二萬二千二百
四十兩零商欠之茶課紙價銀四千六百四十九兩零均著一併
豁免以紓民力該撫卽刊刻謄黃徧行曉諭務使實惠均霑毋任

吏胥舞弊用副朝廷軫念民依至意○諭前因左宗棠督師恢復浙東郡縣規復浙西並攻克杭州省城肅清全浙派兵援剿皖南江西掃除餘孽特沛殊恩將左宗棠錫封一等伯爵以示優異茲據左宗棠奏懇陳下悃懇請收回成命並推功於諸將士各等語所奏意存退讓具見悃誠惟朝廷功懋懋賞原以該督抵浙以後削平巨寇屢克名城肅清浙江全境厥功甚偉豈能無破格恩施以獎勞勩至溫處嘉湖用兵雖得閩師蘇軍之助總由該督調度有方剋期底定洪幅瑱竄擾江西亦由該督派兵援剿方能迅速肅事左宗棠實爲有功國家之臣錫爵酬庸洵可當之無愧所請懇辭伯爵之處著毋庸議○諭前因御史劉慶奏參已革臬司李元度罪重罰輕請仍按律定擬當經諭令會國藩左宗棠查明具奏嗣據會國藩奏稱前因徽州失守將李元度奏參革職拏問本

屬從嚴該革員前在江西力戰撫州支持危局本有兼人之才懇請酌量錄用復經諭令左宗棠查奏茲據左宗棠奏稱李元度固守徽州三日賊眾兵單力竭城陷原參謂其棄城逃避在徽城未失之先殊爲失實其募勇赴浙實係王有齡奏調並非不候審訊擅自回籍該革員援浙時浙東徧地賊蹤進兵之路中斷孤軍未能深入杭州失陷非由李元度逗遛所致惟飾報克復江西義甯等城一節查李元度由平江通城尾賊而來於賊去之後居復城之功未經開仗竟報捷書嗣後在江山隨營剿賊輒因會國藩參劾落職悻悻求去必欲將各營全撤偏索軍餉不顧大局則實咎由自取等語李元度從前本有戰功被參各節亦多不實情尙可原惟在江西飾報勝仗復不顧大局撤勇索餉咎有應得著該部分別情罪秉公按律定擬以昭平允○諭議政王軍機大臣等左

宗棠奏交卸撫篆赴閩督師剿賊並憑陳浙省應辦善後事宜徐
宗幹奏官軍分路剿賊情形各摺片福建官軍分路剿賊並獲勝
仗惟李侍賢汪海洋丁三陽等逆酋尙踞漳州濯田武平等處左
宗棠見飭劉典王德榜由西路進黃少春劉明珍由中路進高連
陞等航海直趨福州出興泉爲東路之師而自率親兵由衢州浦
城赴閩相機調度於地勢軍情籌畫均中窾要卽著督率各軍迅
速入閩實力剿賊以副委任其閩省之曾玉明康國器等軍及江
西赴援之宋國永婁雲慶等軍仍著左宗棠徐宗幹分別檄催會
合夾擊期收聚殲之效至援閩軍餉業由左宗棠飭令蔣益澧楊
昌濬等每月籌解銀十四萬兩源源節濟卽著蔣益澧督飭楊昌
濬妥爲籌畫按月如數撥解以利軍行徐宗幹所請飭部酌撥鄰
餉一節卽可毋庸再議浙江初復百度維新左宗棠於除匪安良

剔除錮弊修復水利諸大端竭慮殫心漸有端緒此時交卸起程
蔣益澧護理撫篆卽屬責無旁貸所有海塘工程農田水利及濱
海各郡整飭水師台州所屬懲除豪惡各事宜並著與楊昌濬審
度時勢次第籌辦馬新貽到任後並著將以上應辦各事宜咨商
左宗棠妥籌辦理至嘉湖槍匪爲蘇浙兩省奸盜之源風俗之害
經蔣益澧節次擒斬劇匪編立船埠稽查保甲勒繳船械浙境漸
已斂戢而匪徒之投入上海者尙多著李鴻章督飭員弁密逮捕
治以淨根株不得敷衍了事致成隱憂左宗棠所稱爲治之道興
利不如除弊任法不如用人蔣益澧等數歷未久請勿繩以文法
等語部中文法皆係歷久奉行舊章自當遵守至地方瘡痍未起
一切章程有必應變通者疆臣果能剴切敷陳朝廷未嘗不特予
俞允蔣益澧等惟當勤求民瘼力矢公忠遇有應行事宜將實在

情形詳晰具奏朝廷必能斟酌重輕權衡至當毋以文法相繩鯁鯁過慮也將此由六百里諭知左宗棠李鴻章徐宗幹馬新貽並傳諭蔣益澧知之○諭閩敬銘奏濟甯散勇謝占魁等聚眾謀逆等語前據江蘇童生劉際昌呈稱裔匪十團變及魚臺縣境當經諭令該撫密速查拏此次片內所稱有散勇謝占魁等聚眾多人句結湖團裔匪約期起事之語該逆謝占魁等雖已拏獲正法而餘黨尙恐未盡難保無句結唐團希圖滋事東省已經肅清此種游勇互相句通務須淨絕根株以免後患著閩敬銘嚴飭該地方官密速查拏按捕餘黨毋致養癰貽患是爲至要將此諭令知之○諭劉蓉奏官軍進趨階州淹遲緣由暨逆回竄犯徽縣請飭曹克忠兼顧汧隴之防等摺片蔡啟兩逆敗殘西竄經劉蓉派令蕭慶高何勝必等軍分路躡擊滿謂漏刃之匪不難卽日掃除茲據

劉蓉奏稱蕭慶高何勝必黃鼎等經略秉章檄調回川分防要隘賊遂乘間竄踞階城句結鹽關等處逆回氣燄又張是該處賊勢復熾亟須迅圖撲滅著駱秉章嚴飭所派之周達武等軍協同蕭慶高何勝必黃鼎等移軍迅赴階州與劉蓉派出各軍併力急攻迅復階州將逆眾一鼓殲殲以免旁竄並著恩麟陶茂林嚴防該逆由岷入鞏竄犯蘭省之路兼斷逆回應援昨諭陶茂林由靜甯一路進兵河狄該處與階岷一帶毗連儻階州之賊被剿北竄與河狄等處之賊聯爲一氣則剿辦更形棘手著陶茂林加意防範毋稍疏虞鹽關回匪猝犯徽縣所屬之傅家鎮等處或圖與階州髮逆相爲犄角或徑由兩當竄入陝境必須趕緊剿辦方不至墮其詭計劉蓉已檄令彭基品等會同駐防鳳縣之軍往剿著卽嚴飭該總兵等奮力縱擊早圖蕆事楚北賊勢已衰仍恐有敗殘之

匪乘虛鋌走著劉蓉飭令隴軍鎮西各營確探嚴防以免竄越遵
花城攻拔後雷正綰已回平涼曹克忠暫紮蓮花城該處甫經收
復不能無勁軍屯紮以資鎮撫兵力本屬不厚刻下又萬難移動
惟邠長汧隴等處爲陝省西路門戶卽爲平涼等處後路藩籬誠
不可令其空虛著都興阿穆圖善雷正綰等悉心籌畫如就近有
可撥之兵卽酌量分飭數營前往該處駐紮以重防務文煜奏請
開缺回旗已有旨允准並令楊能格接辦慶陽糧臺著俟該臬司
到慶時文煜將應辦事宜交付清楚方准回旗楊能格抵甘接辦
糧臺後並著由都興阿傳知准其專摺奏事甘省軍餉多賴陝西
協濟劉蓉憑陳艱窘自係實在情形惟甘省向來地瘠民貧且近
來糜爛情形較陝省爲尤甚劉蓉仍當實心經畫妥籌協濟軍火
等項亦須儘力撥解毋畏其難將此由六百里諭知都興阿穆圖

善雷正紹駱秉章劉蓉文煜並傳諭陶茂林恩麟知之○山東巡撫閻敬銘奏黃水漫溢請修築濮州等處金隄得旨據請動撥本年地丁項下銀三萬兩往濮州等州縣補築缺隄以工代賑著照所議行惟須遴派廉幹之員實心經理務期工料堅實而災黎亦均霑實惠方爲一舉兩得如有官吏剋扣浮冒等弊卽著查明嚴參○予福建殉難總兵官祿魁道員徐曉峰等祭葬世職○甲辰諭內閣前因沈葆楨奏官軍剿賊屢次獲勝生擒幼逆洪福瑱朝廷以該撫自抵江西後籌防籌剿深合機宜浙皖賊匪屢次竄江均經次第掃蕩當降旨賞給一等輕車都尉世職並賞給頭品頂戴茲據沈葆楨奏憑陳悚愧下忱推功諸將並以曾國藩左宗棠不分畛域協餉濟師始得轉危爲安懇請收回成命等語具見該撫退讓之忱惟朝廷論功行賞一秉至公沈葆楨於賊匪竄江以

來督率兵勇殲除各巨酋生擒逆先後肅清疆圉戡亂之功深堪嘉尚至該省兵力不敷調遣雖由曾國藩左宗棠撥軍援助究由該撫開誠布公聯絡一氣始能將士用命迅奏膚功且江西省吏治民風日有起色皆由該撫實力實心克盡厥職所致允宜殊恩特沛以獎勤勩該撫所請收回成命之處著毋庸議○丁未諭議政王軍機大臣等慶昫奏帶隊官員奉差不慎致蒙古官兵遇賊被害一摺另片奏賊踞城堡失火延燒匪勢日見窮蹙等語馳騎校吉勒杭阿吉隆阿等奉派護送蒙古運餉兵丁回旗輒敢半途而返謊言枝梧致該官兵遇賊接仗被害六名奉差不慎任意欺蒙實屬可惡慶昫等請將該二員革職給予馬甲之處殊覺輕縱吉勒杭阿吉隆阿均著卽行革職不准給予馬甲亦不准隨隊當差以爲懶惰欺誑者戒其被害之蒙古兵丁六名卽著由慶昫

造冊咨送理藩院照例議卹賊首赫文典馬萬選等糾集悍黨赴清水堡等處抗拒杜嘎爾一軍所踞甯夏漢城不遑兼顧此時漢城瘟疫時行連次失火納家牆一處亦有失火延燒之事是賊勢渙散將有棄城遁竄之謀著都興阿穆圖善督飭杜嘎爾等軍乘此聲勢迅將清水堡要隘攻克殲其悍賊則其餘羣醜自成瓦解並相度地勢扼要堵遏斷其旁竄之路慶昫常陞務當激勵兵團相機策應以期克復漢城殄除醜類將此由五百里各諭令知之○諭文祺奏哈密逆回變亂會剿撲滅暨調派兵勇救援烏魯木齊色普詩新奏剿辦巴里坤逆匪並請籌撥糧餉各摺片此次逆回糾眾煽亂伯錫爾督兵助戰調度有方所部回眾皆能踊躍用命奮勇前驅深堪嘉獎伯錫爾前因開修渠工出力已賞加親王銜復因恩麟前奏殲滅回匪已特旨賞用黃纁著文祺傳諭該郡

王令其益加奮勉爲國宣勤此次所請賞加勇號著暫行存記俟再立有功績更當懋賞酬庸以旌勞勩吐葫蘆一帶餘匪卽著文祺飭令派出兵勇會同伯錫爾所派之伯克纏頭等實力搜拏以清餘孽烏魯木齊業經被陷協領功訥布等前諭保恆飭令駐紮濟木薩一帶仍著文祺督令該協領等實力防剿俟各路援兵到齊合力進擊迅復烏城所陳賊眾兵單自係實在情形俟內地兵力可以分撥卽當陸續出關大張撻伐新疆餉銀已屢諭沈桂芬籌款接濟前已由草地解去銀八萬兩交科布多城分撥計時諒已可到以後當可源源撥解巴里坤漢回變亂雖經色普詩新派兵剿殺而逃竄餘匪亦須趕緊撲滅方免蔓延惟兵丁口糧缺乏勢難枵腹荷戈著恩麟飭令安西燉煌等處地方官籌辦糧石解赴巴里坤滿營以資接濟並著色普詩新隨時設法撫綏以安兵

心該處商民既能捐助糧石以顧兵糈可見該商民等尙知大義
 昨因御史張觀鈞奏山陝各商在伊犁等處皆有分鋪請飭傳各
 商寄信新疆將存賞兌餉由本籍發還已諭令恩麟等查照辦理
 見在巴里坤如有殷實商民肯將存賞兌餉既可濟目前之急亦
 可省轉運之勞並著恩麟等斟酌情形妥籌辦理惠慶已起程前
 往古城扎克當阿已赴哈密署理辦事大臣見在哈密逆回雖經
 剿滅而彈壓撫恤均關緊要且該處爲新疆門戶尤須力籌保衛
 扎克當阿雖經到防仍著文祺體察情形如須該提督駐紮鎮撫
 卽著暫緩起程以重邊防將此由六百里諭知文祺色普詩新並
 傳諭恩麟知之○戊申諭內閣前因兵部奏軍臺廢員已革兵部
 尙書穆蔭補交臺費當經降旨俟扣滿三年再行釋回茲據阿克
 敦布等奏該廢員見已三年期滿遵旨釋回等語穆蔭前在軍機

大臣上行走有年班次居首於載垣等竊奪政柄不能力爭溺職孤恩獲咎甚重此次雖經加恩釋回仍著閉門思過毋得再蹈愆尤○已酉諭內閣李鴻章奏請將蘇城咸豐十年以前清查攤補各款一律豁免以紓民困一摺江蘇省自軍興以來屢遭蹂躪見雖全境肅清而民力彫殘元氣未復該省歷屆辦理清查各案應行攤補之款爲數甚多而州縣籌補之法不免仍借資民力甚至恣意浮收有提無解且該省見飭酌減賦額方冀與民休息力洗從前弊竇此等無著待補之款若仍令攤賠不肖官吏或致藉口肆其朘削於民生吏治均有關繫所有江蘇省清查第五案內籌補攤補銀兩及咸豐十年以前一切由外捐攤各款加恩均著全行豁免其餘派攤名目並著永遠禁革經此次豁免後各該州縣既無賠累之苦惟當激發天良力除積弊於應徵之額年清年款

如有藉口民欠以致缺額卽著該督撫查明嚴參治罪用副朝廷體恤黎元勤求吏治之至意○諭議政王軍機大臣等喬松年奏見在布置情形並請飭楚豫分派守城扼隘遊擊之兵各專責成等摺片蔣凝學一軍由英山拔隊赴楚陳飛熊一軍亦回楚歸官文調遣著官文卽妥爲調派迅將黃孝德安等處餘賊一律掃蕩毋畱遺孽張總愚陳大澹等同竄楚豫餘黨無多自不難於翦滅惟僧格林沁以統師重臣追奔逐北幾無停晷而楚豫境上不能豫籌堵截之方未免曠日持久著官文張之萬通籌大局酌分三項守城之兵專守城池扼隘之兵專守險要賊來卽擊不必遠追遊擊之兵分作兩枝以一枝隨僧格林沁轉戰以一枝駐於本省邊界往來追剿援應各專責成賊蹤何路竄逸卽惟守隘之員是問如竄陷城池卽惟守城之官是問儻隨剿不力賊去不追卽由

僧格林沁查明嚴行參處如此明定章程庶不慮賊之東奔西竄而足以制其死命見在張總愚等竄向何處僧格林沁當居中駐紮派兵四面兜拏明立獲犯賞格嚴定縱匪罪名以期廓清地方一勞永逸潛太英霍一帶見雖無賊仍著喬松年督飭英翰等實力防範搜查毋任再有竄越將此由五百里各諭令知之○庚戌署福建臺灣鎮總兵官曾元福奏續獲匪首廖談等見定期馳赴漳屬搜捕餘匪並順道巡閱營伍得旨著卽會同丁曰健設法將洪欉陳鯨等首從各匪迅速捕斬淨盡毋令稽誅全臺營務廢弛並著該署鎮認真校閱實力整飭鎮道均經出省當嚴飭陳懋烈於郡城防守彈壓事宜妥爲辦理不可稍涉大意○加賞通州王恕固煮賑米三百石○辛亥諭議政王軍機大臣等官文奏上竄髮逆狂奔德隨一帶派軍分路兜拏一摺髮逆上竄雲夢孝感境

內經官軍分路截殺疊有斬擒賊向京山應城一帶竄去張總愚逆黨復由光山黃安竄向黃陂之河口范立川餘黨亦自信陽應山竄入隨州之安居潁潁圖與上竄之逆合股逆蹤腐聚德隨等處漸有西趨之勢官文見飭江長貴等力扼襄樊並飭常星阿等由京山安陸前進成大吉馳向茅茨畈進剿李成謀梁洪勝等軍力顧京鍾應城要隘所籌尙合機宜卽著嚴飭各軍前截後追務將此股敗匪就地殲除毋令旁竄常星阿等前次赴援不力致賊乘虛奔竄業經降旨革職畱任此時如再不知奮勉縱賊西行卽著官文嚴參按照軍法治罪不得稍涉姑容僧格林沁督軍楚豫於各營接仗情形必所深悉如有臨陣退縮之員無論楚豫兵官並著指名嚴參懲辦以肅戎行德隨一帶豫境處處毗連張曜一軍已抵棗陽正可攔頭截擊著僧格林沁張之萬飭令會合楚軍

兩面兜剿毋令竄擾豫疆老河口爲繁盛之區該逆如繞過襄樊轉窺光化則該處適當其衝著官文飛催梁作楫等實力扼剿遏其奔突此股敗殘之匪奔竄靡定總由防剿各軍未能聯絡兜擊有追兵而無遏截之兵所致見在賊蹤西向難保不由鄖西一路窺伺陝疆官文張之萬務當督飭在事將弁繞出賊前痛加剿洗楚省兵力甚厚儻奔竄賊股不能在楚境就地殲除任令長驅入陝以鄰爲壑必將官文從重治罪決不寬貸劉蓉前奏商州僅存鎮西軍三營興安僅存隴軍兩營此外猝無兵勇可調等語此時賊蹤漸近著劉蓉添調兵勇分赴商州興安一帶實力防範不得稍有疏虞蔣凝學一軍官文既擬令其馳赴甘肅援剿著卽飭令取道鄖西等處將髮捻各匪就近攔擊以輔陝省兵力之不足俟此股殄滅再行由陝入甘至該道員所部僅有三千五百人而降

眾馬隊亦有三千人勢均力敵恐難鈐制甘省地瘠民貧餉難充裕並著官文斟酌情形或將此起降眾另行分隸各營毋庸隨同入甘較可放心霍山竄至黃安股匪人數無多著僧格林沁飭令陳國瑞郭寶昌等分投兜剿迅速殲除喬松年仍當督率皖軍嚴防回竄毋稍大意將此由六百里各諭令知之○廣浙江台州府暨臨海黃巖太平甯海天台仙居六縣學額各三名○壬子諭內閣前因楊岳斌沈葆楨奏參道員王沐帶兵逗遛並營官王安敦等縱勇滋鬧當經降旨將王沐革職發遣王安敦等一併革職提訊茲據沈葆楨奏遵旨訊明該營官等隨同王沐在撫州防剿嗣經楊岳斌札飭移紮秀才埠及札調駐守崇仁均因賊勢無常往返請示並非沿途逗遛撫州拔隊時該營病勇極多閒有因病落後尙無騷擾情事自王沐撤去統領各營兵勇紛紛索餉經該革

員等再三開導終懷疑慮亦非敢於違抗等語此次該營官等於各營勇丁防範不周及懷疑索餉復不能設法約束實屬咎無可辭惟尙無縱勇滋鬧有心抗拒情事尙可曲原已革運同銜知縣王安敦遊擊賀長春唐榮貴業經革職均著免其治罪另片奏已革道員王沐於去歲皖南之役賊已深倡婺源該革員以孤軍首當其衝三戰皆捷皖南轉危爲安浙江江西亦資保障等語王沐前在皖南堵剿竄江逆匪尙有微勞足錄著加恩免其發遣○諭議政王軍機大臣等沈葆楨奏遵旨援閩兼防回竄一摺賊匪竄陷漳龍等處沈葆楨飭劉典等進援並令韓進春劉勝祥由會昌察看賊勢就近進規武平見據探稱武平業經閩粵各軍克復漳逆不願入粵有回江西過年之謠該撫見令王開琳帶王文瑞所部入閩又以江省兵單咨商周寬世由信豐進紮長甯飭張岳齡

由龍泉進駐會昌以固南贛門戶韓進春移紮瑞金劉勝祥移紮廣昌與石城之席寶田互相聯絡以固撫建門戶所籌均尙妥協著卽飭令在防各將士及地方官弁認真防守毋令一賊回竄江境劉典所部八千人進駐汀州宋國永等亦俱陸續可到並著督飭該員等會合閩浙諸軍相機進剿克復地方務將逆匪就地殄除毋任再行旁竄將此由五百里諭令知之○湖南巡撫惲世臨奏黔省下游苗教等匪復行勾結見籌防剿得旨所籌尙妥惟當嚴飭戈鑑周洪印等就見有兵力聯絡扼剿以杜分竄趙煥聯一軍能否撤回及擬調勁旅大舉援黔之處均著該撫察看情形妥籌辦理○廣西巡撫張凱嵩奏分勦思恩南甯兩屬匪徒收復村寨見飭各軍乘勝掃蕩得旨粵西羣盜如毛惟當嚴飭易元泰等軍不遺餘力分路掃蕩劉坤一見赴橫永一帶調度卽飭將孫仁

廣一股迅速殲除進規南郡以靖邊氛○予浙江陣亡總兵官王
聯芳等祭葬世職○癸丑諭議政王軍機大臣等恩麟奏鹽關回
匪出巢滋擾秦州戒嚴見在籌辦情形一摺甘省鹽關逆回竄撲
秦州將城外回民裹脅並縱火焚燒四鄉搶掠民糧勢極猖獗林
之望所部張華一軍經恩麟撥往階州助剿見僅調到秦安兵勇
四百名到城防守因兵力較薄迄未大挫兇鋒秦州爲甘省富庶
之區設有疏虞勦辦更形棘手曹克忠所撥四營赴援秦州尙恐
不敷分布著都興阿穆圖善雷正綰悉心籌度曹克忠一軍能否
馳赴秦州援剿並應如何分兵駐紮蓮花城以扼險隘之處均一
併妥籌兼顧如蓮花城布置已妥無虞回逆紛竄卽飭曹克忠酌
帶所部星速往援秦州迅解城圍毋稍延緩並著恩麟嚴檄林之
望就在城兵力與曹克忠所撥四營妥籌防剿或進攻鹽關回巢

以牽賊勢毋致稍有疏失近省會甯安定一帶賊匪時出肆擾陶茂林一軍見已西進卽著懷遵前旨迅解靜甯城圍並將安會等處竄匪節節掃蕩再行馳赴省垣進規河狄前據劉蓉奏稱鹽關回逆竄犯徽縣之傅家鎮等處刻下嚴州又復戒嚴匪蹤滋蔓甚廣如與階州髮逆勾結攻剿更難著手著駱秉章懷遵前旨嚴檄周達武等軍協同肅慶高等移軍迅赴階州與劉蓉所派各軍併力急攻迅復階州城垣以杜分竄而免勾結蘭州省城防務恩麟就見有兵力慎密防維並嚴飭派援階州之張華一軍與川陝援兵聯絡進剿毋許稍涉疏懈雷正綰見在移軍平固一帶如蓮花城防兵尙單卽著酌撥兵勇前往協守以便曹克忠抽調所部馳援秦州卽與恩麟等妥籌會辦將此由六百里諭知都興阿穆圖善雷正綰駱秉章劉蓉並傳諭陶茂林恩麟知之○申諭山西等

省迅解甘肅軍餉○廣江西吉安府學額二名龍泉縣八名○甲寅諭內閣 慈安皇太后之母承恩榮敬公夫人溘逝 慈衷哀

慟悲不自勝朕仰體 孝思中懷莫釋著由內賞銀三千兩交廣

科祇領經理喪事○兩廣總督毛鴻賓等奏賊擾大埔縣城經援

軍擊退並越境克復武平等城得旨朱家綬著暫行革職畱任仍

著查明該縣城是否失陷該令有無與賊巷戰各情分別奏明辦

理大埔既轉危爲安粵軍見已越境克復武平等城賊勢趨重漳

州著嚴飭方耀等跟蹤追剿會合江西閩浙諸軍將竄閩之賊就

地殄滅漳州距潮州較近饒平縣屬亦有賊蹤並有沿海擄船竄

擾澄海之信著卽移撥重兵嚴行遏截如任令入海剽掠貽患無

窮惟毛鴻賓等是問○乙卯諭內閣近來各省甄別人員往往投

效軍營鑽求差使旋以軍功濫保開復原官既開仕途取巧之習

兼壞軍營樸直之風嗣後各路統兵大臣凡遇各省甄別人員不准隨營收錄濫請開復用絕夤緣○諭議政王軍機大臣等劉蓉奏籌辦階州等處軍情並請嚴防下游捻匪上竄一摺鹽關回匪竄往秦州之馬跑泉階州蔡啟兩逆分路扼守隘卡竟圖堵我進兵之路必須官軍四面環擊方可制其死命昨據恩麟奏鹽關回匪出巢滋擾秦州戒嚴當因匪蹤滋蔓恐與階州髮逆勾結諭令駱秉章嚴檄周達武等軍協同蕭慶高等迅赴階州與劉蓉所派各軍併力急攻克復城垣著劉蓉嚴飭各軍會合周達武等實力掃蕩迅復階城毋任逆匪久踞惟湘果英毅諸軍須由漢郡採辦米糧周達武等軍所需糧米亦須由昭劍一帶採辦相去較遠轉運倍艱著恩麟卽派道府大員由階州附近一帶州縣採辦糧米接濟其需用糧價銀兩卽在各軍應發月餉內扣還如此辦理並

不至貽累甘省恩麟當妥籌迅辦不得視同膜外致誤事機由楚西竄之匪窺伺陝疆著官文等懍遵前旨嚴飭馬步各軍取道鄖西一面繞前截擊一面跟蹤躡剿以期迅掃逆氛蔣凝學一軍仍飭令取道鄖西等處將髮捻各匪就近攔擊俟此股殄滅卽行由陝入甘興商防兵甚單劉蓉務當遵奉前旨設法添調兵勇分赴各該處實力嚴防毋稍疏懈正在寄諭間據張之萬等奏捻匪被擊西遁逼近宛境等語張陳等逆在光山縣境被擊西竄賴汶洸等亦擾至棗陽南之吳金店是唐桐各屬情形旣形喫重尤恐匪眾句合繞竄宛境著僧格林沁張之萬嚴飭各軍分路扼剿務將窮竄之匪一鼓殲滅毋任竄入陝境又成不了之局邱元才以賊中悍黨窮蹙乞降雖不妨暫事籠絡亦須時防反側以弭後患汝光一帶匪蹤紛竄靡定著張之萬嚴飭該處防兵嚴密堵遏以重

邊防其降眾由汝光經過者人數較眾並著飭令該處文武員弁彈壓撫輯毋令滋事將此由六百里諭知僧格林沁官文張之萬劉蓉並傳諭恩麟知之○諭常清明緒奏瀝陳伊犁地方情形並烏什阿克蘇二城被占一摺新疆南路各城先後被賊占踞此時大兵未集尙難進剿總宜先將北路之賊趕緊撲滅方可進規南路烏魯木齊迪化城前據保恆奏報業經失守賊蹤擾及阜康是該處逆勢甚爲猖獗見在東路之古城哈密等處經保恆文祺等督兵防守尙可無事惟西路道途梗阻聲勢未能聯絡明緒身膺疆寄自當統籌全局商同武隆額督兵東進節節掃蕩迅將庫爾喀喇烏蘇餘匪廓清進復綏來縣城直達烏魯木齊疏通大路此次回眾變亂皆由奸回捏造謠言乘機煽惑其中裹脅之人未必盡甘叛亂明緒武隆額當遵照八月二十五日諭旨分別良莠剿

撫兼施惟同性狡詐往往以就撫爲緩兵之計亦當加意防範不可墮其術中塔爾巴哈台既有回匪勾結之信亟應先事豫防明緒已將榮全所帶蒙兵五百名派協領郭羅那帶回塔城防守著卽知照錫霖等添派兵丁嚴密防維毋稍大意內地精兵已陸續調撥一俟甘肅大路疏通卽可出關助剿明緒武隆額仍當嚴飭帶兵員弁迅速圖功不可專待援兵致誤軍事將此由六百里各諭令知之○諭恩麟派員採辦糧米濟軍○諭僧格林沁等扼賊西竄毋令入陝○丁巳廣江蘇鄉試中額四名安徽三名合肥縣學額十名盱眙六名六安桐城各五名壽定遠阜陽天長各四名無爲巢懷遠各三名和泗霍邱全椒含山各二名廣德滁太湖宿松涇旌德廬江舒城鳳陽鳳臺各一名○戊午諭議政王軍機大臣等徐宗幹奏疊剿漳龍踞逆獲勝暨浙師到閩日期一摺閩軍

期辦漳龍等處賊匪疊獲勝仗其竄踞汀境之匪亦經兵勇擊敗
尚未大挫兇鋒高連陞一軍航海來閩經該撫飭令取道興泉由
同安一路進攻漳州並飭黃少春改由興化進兵與高連陞會合
後卽由安溪至漳屬之長泰一帶前進約期兜剿所籌尙屬周妥
卽著左宗棠徐宗幹督飭高連陞等會合閩軍協力進擊迅復各
城毋稍延緩劉典王德榜兩軍計日已到閩並著左宗棠等檄
令該臬司等星速赴援以資得力康國器趙均所部官軍見紮永
安連城務令嚴杜汀境竄匪歸併龍巖並防該逆乘機下竄毋稍
鬆勁前據左宗棠奏已由衢州起程赴閩計日已達閩境務當相
度機宜將各城踞匪一鼓殲除以期肅清邊圉將此由六百里各
諭令知之○予熱河駐防從征死事官吏將士建祠○己未諭內
閣前因升任內閣侍讀學士于凌辰奏吉林獄訟繁多請專設理

刑大員辦理刑名當經諭令阜保查議具奏茲據阜保奏稱吉林地處邊陲若添設監司大員則建立衙署及廉俸等項所費不貲請查照熱河設立刑司之例酌加變通等語著照所請卽由刑部揀派正途出身漢郎中或員外郎一員專司主臬科甲出身主事一員幫辦主臬並再派刑部滿郎中一員專司掌印其原設之協佐領著仍畱一員幫辦掌印並辦理蒙文事件統歸吉林將軍管轄以資治理其原設理刑主事一缺卽著裁撤所請該司員等三年期滿無過由該將軍出具考語送部引見並如何酌加獎勵之處著該部妥議具奏尋刑部議派往吉林司員擬請兵部酌給車馬由驛遞行三年期滿勤慎辦公始終無過送部引見交吏部從優獎敘如不能稱職仍隨時奏撤另行揀派以昭慎重從之○諭前因給事中劉毓楠奏吉林賭匪盜匪仇殺搶掠將軍景綸粉飾

欺蒙縱令協領常明等擅權納賄等款當經諭令阜保確切查明據實具奏茲據奏稱查明被參各款或事出有因或查無實據分別定擬具奏此案筆帖式巴克喜經管錢糧重務雖無虧短官項情弊輒敢將庫存錢八萬七千餘吊擅存私鋪倚官射利壟斷營私情殊可惡巴克喜著卽行革職交刑部從重定擬罪名具奏協領明祿於巴克喜私用庫款扶同袒庇奉派管理官錢鋪於燒商于焯堃短少官錢攬頭王永祥拖欠地價並不嚴追雖訊無與王永祥拜認義叔收受重賄確據而挾私徇縱玩視帑項且平日把持公事專擅自由實屬有玷官常明祿著卽行革職永不敘用協領常明雖訊無與巴克喜等夥開當舖及得受王永祥重賄各情惟歷年管理銀庫於巴克喜擅動庫款營運豈得諉爲不知且縱容刁佃久欠鉅款於應放兵丁錢糧不能如期開放教場官地違

例任令商民造房私取地租實屬咎無可辭常明著交部嚴加議處先行撤任聽候部議參領富全雖訊無與常明明祿等舞弊罔利確據辦理山匪董鎖子等案亦無審訊不公情事惟於首犯白珠等糾眾將伊弟姪擄去放回並不稟請捕拏始終隱匿真情以致重犯至今未獲亦有應得之咎富全著交部議處吉林將軍景綸雖查無收受謝儀及開設錢鋪之事惟以專閫大員任令所屬把持公事牟利營私毫無覺察實屬形同聲贖豈能復勝將軍之任景綸著先行交部嚴加議處來京聽候部議吉林將軍卽著阜保署理副都統麟瑞與景綸同辦一事未能稽察亦屬不合著先行交部議處尋議景綸常明富全均請卽行革職麟瑞降三級調用不准抵銷從之○諭議政王軍機大臣等官文奏髮捻敗逆奔趨襄東一帶見籌會剿一摺德安股匪由府北之平林市竄向雷

公店隨州之賊分竄襄棗之黃龍壩資山等處經官軍擊敗奪路狂奔前由霍山竄入黃安敗匪復上竄孝感應山之小河溪等處奔赴隨州雖係亡命之餘而其勢尚熾且匪氛尚在楚境何得遽謂全境將次肅清腹地無虞官文旣稱逆匪歸併一處正可合力兜剿就地殲除不准徒託空言必須嚴申軍令督飭常星阿李成謀等軍一面分路追剿一面繞出賊前迎頭截擊務須悉數殲誅毋任逃竄出境成大吉已紮楚豫交界之呂堰驛梁洪勝已紮老河口楊朝林馳赴鄖陽並願鄖西竹溪一路卽著責令該提督等實力遏截儻任令賊蹤竄入豫陝境內必當按照軍法治罪蔣凝學一軍並著飭令趕緊拔隊馳赴鄖西以備截擊毋稍延緩僧格林沁督軍已抵棗陽際此雪虐風饕衝寒督戰朝廷甚爲厯繫前曾諭令該大臣如楚豫官兵臨陣退縮者卽指名嚴參懲辦見在

官文所派各軍已由僧格林沁調遣卽著督飭該將士奮力剿賊與郭寶昌等軍會合兜擊迅殄逆氛儻在事員弁有不遵調度者卽著指名嚴參以軍法治罪毋稍姑容前據官文奏劉連捷等坐守皖竟並未赴鄂嗣據會國藩奏稱已派劉銘傳等統淮勇渡江剿皖鄂之賊劉連捷等赴黃州候官文調遣何以此次官文摺內於劉連捷等入楚一節並未提及著會國藩嚴飭劉連捷等星馳入鄂會合楚軍併力擊賊儻敢意存畛域任意遲延朝廷法令具在不能因該軍士在江南剿賊著有微勞稍從寬宥也將此由六百里各諭令知之○以戶部左侍郎阜保署吉林將軍○庚申諭議政王軍機大臣等楊岳斌奏抵湘日期並請催各省協餉一摺前因楊岳斌募勇援甘當經諭令左宗棠等各籌銀八萬兩憚世臨於東征局撥銀四萬兩李鴻章籌銀十萬兩剋期如數解交茲

據楊岳斌奏行抵長沙卽擬招勇無如各省協餉僅准江西解銀四萬兩彭玉麟解銀一萬兩惲世臨先籌銀一二萬兩除製辦鍋帳等項外所餘無幾請飭催江蘇等省督撫將應解餉銀如數湊交委員解回等語著官文左宗棠毛鴻賓李鴻章吳昌壽徐宗幹郭嵩燾惲世臨按照原撥數目趕緊湊齊交楊岳斌守提委員解回俾得早日募勇赴甘毋得視爲不急之務任意宕延致誤戎事各省所奏協餉已有報解在途者諒陸續均可解到楊岳斌當懷遵疊次諭旨迅卽招募新勇如集有成數或先派委員帶數營赴甘或自行帶赴新任若俟各省餉項到齊方始開招則招募訓練又需時日何以濟甘省然眉之急刻下甘省情形靜甯尙在被圍甯夏仍未克復安會河狄均有賊氛而鹽關回匪出擾秦州又復戒嚴都興阿雷正綰所部兵勇各萬餘人曹克忠陶茂林所部亦

各數千兵力並不過薄再益以楊岳斌所部勁旅節節攻取無難
綏靖邊疆該督務當安速區畫部勒起程用副委任將此由六百
里各諭令知之○諭勞崇光等奏克復興義府城並勦辦新城竄
匪獲勝各摺片回逆盤踞興義府城經署知府孫清彥等帶領兵
練分路進攻並密約朱天賞等作爲內應於九月十六日將興義
府城克復該城雖經攻拔惟首逆張凌翔乘閒脫逃餘匪亦多竄
逸著勞崇光張亮基督飭派出各軍乘此聲威跟蹤緊躡將張凌
翔嚴密搜捕並將逃竄餘匪及貞豐新城之賊悉數殲除毋任該
逆首久稽顯戮該城善後事宜著該督等督飭文武妥爲籌辦新
城回匪因普安廳防堵嚴密不克假道赴滇卽糾各匪圍撲該廳
城池經官軍疊次追勦餘匪逃踞播政歸順一帶地方該逆圖援
曲靖回逆馬連升難保不乘閒再行攻撲以遂其赴滇之計卽著

嚴檄各軍實力掃蕩務將此股就地殄除毋令闖入滇境方爲妥善將此由六百里各諭令知之○予貴州陣亡從九品胡廷澤等被戕知縣馬鈞等祭葬世職○予江南浦口陣亡殉難將士建祠○予揚州陣亡殉難官吏將士附祀總兵官雙來祠○辛酉飭北路各城迅運新疆軍餉並查明轉解日期以聞任意稽延者戶部嚴參○癸亥僧格林沁奏擒匪張總愚陳大濬等股匪經我軍在光山縣南之八里畝新店等處疊次擊敗該逆向西狂奔當飭副都統色爾固善等及管帶陳國瑞勇隊之總兵林起敬等馬步各軍跟蹤尾追臣親督翼長恆齡等馬隊於十一月初四日馳抵棗陽探得髮逆賴汶洸邱元才捻逆牛洛紅任柱李允等各股匪經副都統常星阿等馬步各隊躡蹤尾追該逆竄至襄陽縣東北黃龍壩峪山一帶盤踞臣擬於初八日督隊進剿詎該逆等已於初

七日夜間由峪山向西北滾河一帶竄去臣令常星阿藍斯明等馬步隊伍追勦至蔣家溝地方該逆馬步分列以待我軍常星阿等馬隊先行衝擊該逆抵死不退是時姜玉順等步隊及恆齡等馬隊均布陣於山坡之上恆齡等見常星阿軍力不支立即帶隊助勦該逆馬步從旁撲犯我軍轉戰陷於溝坎泥淖之中不得馳騁而姜玉順梁洪勝等步隊雖經接應未能盡力支撐致被該逆乘勢包鈔因而小挫收隊後駐紮官莊初十日探得捻逆張總愚陳大清等匪乘夜由王家河北竄渡河向西逃竄與前股髮捻句合經我軍乘賊渡河奮勇衝擊斃賊百餘名落河淹斃者無算餘皆乘夜竄散該逆既合夥西趨誠恐圖竄樊城擾及完善遂飭姜玉順等各率步隊移紮樊城扼要堵勦十一日臣督帶馬步跟蹤前進至呂堰驛地方探得該逆等合夥向西南鄧州屬白洛堰一

帶奔竄我軍探蹤追擊適翼長成保等馬隊總兵郭寶昌張曜兩軍步隊趕到臣卽於十四日督飭各軍分中左右三路整隊前進追至鄧州之唐坡地方賊匪傾巢出拒經恆齡等馬隊更番衝擊賊勢少卻該逆復出大股向我右哨步隊拌死來撲我軍極力支持該逆愈聚愈眾致爲賊匪鈔襲官軍挫失兵勇俱有陣亡該逆因我軍失利膽敢乘隙上竄在鄧州東北白牛里一帶盤旋亟應撥兵截剿臣已飛咨督臣官文撫臣張之萬喬松年劉蓉等檄飭防軍扼要堵擊毋任闖入邊境並札調姜玉順梁洪勝兩軍來營協剿令藩司英翰道員蔣凝學各率所部移紮商城提督成大吉進紮新野以厚兵力杭州將軍國瑞已於十一月初七日率馬步官兵由官山移紮信陽州以爲後路聲援臣已函會該將軍妥籌防剿臣暫駐鄧州稍加整頓擬卽督軍合力追剿此次接仗失利

雖因帶隊各員未能勦力同心致有敗挫究係臣調度無方實難辭咎應請旨將臣嚴加議處臣惟有激勵將士設法進攻誓滅窮寇上諭議政王軍機大臣等髮捻各股由棗陽黃龍壩峪山等處向西北滾河一帶竄去經僧格林沁督軍追擊乃帶兵各官未能勦力同心以致馬步官軍或因陷於溝坎泥淖遂致失利或因霧氣迷漫爲賊所乘總由該將弁等帶兵不能得力屢致敗挫卽著僧格林沁查明據實嚴參懲辦以肅戎行該逆見竄鄧州東北白牛里一帶僧格林沁移紮鄧州卽著整飭隊伍督令帶兵將弁合力追勦以贖前愆僧格林沁自請嚴議之處著加恩寬免賊蹤已入豫境著張之萬嚴飭張曜等實力嚴防毋令紛竄腹地擾及完善鄧州距陝較近著劉蓉檄飭在防各軍嚴密防勦毋令闖入邊境陝甘興商等處兵力甚單蔣凝學一軍見紮商城未能由鄖

西繞出賊前迎頭截剿必須由楚省調撥勁軍繞前截擊方能遏其入陝之路卽著官文迅撥得力兵勇馳赴豫陝之交界地方會合陝軍奮力兜截毋稍延緩前諭會國藩迅飭劉連捷等軍星馳入鄂歸官文調遣卽著仍遵前旨飭令迅速前進儻敢逗遛卽著會國藩查明嚴參並著官文檄調劉連捷等軍到鄂以便騰出兵力赴陝助剿以資周轉國瑞見由光山移紮信陽卽著該將軍妥籌布置相機策應將此由六百里各諭令知之○諭林鴻年奏擬辦滇事大概情形暨勦辦鎮雄土匪等匪各一摺所陳籌度辦滇之法非借資川力別無良策自係實在情形惟見在馬如龍與梁士美不協岑毓英亦與馬聯陞不協滇省員弁兵練不知紀綱以故數年來百端廢墜勢如亂絲該撫見擬先靖黔匪黔事既定卽可合力辦滇著卽咨商四川湖南各督撫妥籌會剿其滇黔邊界

卽以劉嶽昭任之滇之東境亦可借資震懾戡邊馬邊民勇卽由林鴻年酌募精壯數千人認真訓練所需軍火由川省借用儻滇省機有可乘卽可相度進剿以期得力昨據勞崇光等奏貴州新城回匪與雲南曲靖府逆回馬連升勾連一氣岑毓英進攻曲靖該逆馬連升被剿窮蹙等語此次摺內僅稱岑毓英與馬聯升不協是否卽係勞崇光等所稱之馬連升著林鴻年查明具奏永北廳失守情形及文武下落並著查探明確照例辦理一面飭令派出各員前赴大姚元謀永北一帶激勵團練防其北竄入川鎮雄與川黔相錯逼近昭通土苗各匪嘯聚自應迅圖廓清方不至阻塞由昭通一帶進兵之路見在李延忠節節進剿擒獲賊首鎮雄地方漸有起色卽著責令該署牧乘此聲勢逐節清釐如果始終出力卽由林鴻年酌覈請獎該州附近土匪多係雲貴四川三省

邊界之人苗匪則畢節威甯者居多三省地勢交錯自應會商勦辦方可迅就撲滅卽著與駱秉章勞崇光張亮基妥籌辦理以顧全局將此由五百里諭令知之○甲子諭議政王軍機大臣等官文奏兵力厚集襄樊會勦敗匪楚省可保無虞定期回省會國藩奏遵旨回任擬赴安慶黃州妥籌防勦各一摺據會國藩奏劉連捷等軍宜以黃州上巴河爲老營凡黃州八屬有警卽令分隊馳勦劉銘傳等軍宜以三河尖固始爲老營凡皖豫交界有警卽令相機防勦有此二枝勁旅庶可騰出湖北本省兵力專顧德安襄陽等處以爲通力合作之計自是老謀深算惟遠防不如近勦見在賊蹤駸駸西竄若駐紮三河固始未免距賊較遠兵情旦夕變遷著會國藩飭令劉連捷劉銘傳等入鄂入皖之軍探蹤前進均歸僧格林沁調遣以期力殄狂氛肅清餘孽會國藩擬俟科場完

竣諸務就緒乘坐輪船駛赴安慶黃州一次不若就目前李鴻章
尙在江甯該督卽日出省規畫指揮嚴飭諸將認真防剿較可得
力俟各路布置定妥仍卽馳回江甯辦理善後一切要務官文以
西征軍實及金陵遺勇欠餉尙無端倪並公事積壓已久請回省
督辦自係實情著卽回省督飭司道認真籌辦一面嚴飭水陸各
軍認真剿辦務將此股賊匪卽在楚境就地殲除毋任旁竄他省
僧格林沁暫駐鄧州惟當恪遵昨日諭旨穩慎進兵力圖剿洗凡
遇山險泥淖均以步隊當先平原曠野以馬隊當先並須豫撥勁
兵嚴扼該逆西竄之路前截後追毋任入陝劉連捷劉銘傳等軍
並著該親王酌量調度以資厚集其何路兵將赴調遲延卽著僧
格林沁嚴行參奏皖境見雖無賊喬松年仍當飭屬妥防不可稍
有疏失張之萬惟當懷遵昨日寄諭嚴飭張曜等實力防剿興商

之防甚單劉蓉當設法添派兵勇豫籌堵截免致臨渴掘井貽誤
事機將此由六百里各諭令知之○予江甯殉難國子監典籍錢
繼文祭葬世職○乙丑諭議政王軍機大臣等景綸麟瑞奏山匪
聚眾蠢動派兵剿捕獲勝一招據稱該城西南許三家子屯地方
突有山匪多人持械入屯搶劫團練槍礮經景綸等派佐領依常
阿帶兵役馳往投剿擊斃夥首張楚兒把勢等五十餘人生擒宋
義等十三人餘匪向圍場邊山竄逸分竄響水河子屯一帶地方
等語吉林圍場地方遼闊盜賊易於匿迹若不迅速殲滅必致蔓
延著阜保麟瑞嚴飭依常阿等並添派之雲騎尉富明阿等分路
掩捕務將此股匪黨殄除淨盡並將匪首梁才拏獲毋任他竄並
著玉明寶珣選派得力弁兵一體堵擊其附近圍場各地方該將
軍等尤當隨時實力巡緝以靖寇蹤將此由五百里各諭令知之

○諭雷正綰奏規拔固原疊平逆壘曹克忠馳解秦州城圍進搗
鹽關請畱余福象在營效力各摺片雷正綰自克逆花城後回軍
涇平規復固原將石家溝等處逆巢平毀移營進逼東山城賊復
大潰追至距固城三十里之打河店並將鸚哥嶺等處巢穴塌平
所辦甚爲得手此時軍威大振該逆敗潰之餘聞風膽落雷正綰
見抽軍十五營由瓦亭大道進剿飭總兵胡大貴等次第滾營大
舉不難功收破竹迅復名城著卽親督各軍兩路夾擊務嚴防回
逆狡詐穩慎進兵將該逆就地殲殲堅城立拔其逆首孫義寶尤
當設法擒斬毋令漏刃他竄又形句結曹克忠馳援秦州城圍立
解復將分擾甘泉寺之賊斬馘殆盡拔營赴天水進剿鹽關斃賊
甚夥著卽飭令該總兵乘此聲威鼓行而西迅將鹽關巨巢攻克
以期節節掃蕩該處地連秦蜀道路紛歧尤當防其與階州髮逆

句合聯絡致勦辦又形棘手陶茂林見赴蘭州專顧西路著傳諭該提督仍遵前旨先解靜甯之圍順道勦除安會一帶逆匪再赴蘭州將河狄一帶軍務妥籌會辦此時甘省各軍分三路勦辦賊勢既分軍務不難日有起色都興阿穆圖善雷正綰等惟當通盤籌畫妥爲調度迅殄狂氛以期肅清西陲用副委任余福象一員見經雷正綰派令回楚招募精銳六營來甘俟抵甘後卽著該署提督留於軍營效力以資臂指之助其所募勇丁或分撥數營赴穆圖善軍營之處屆時斟酌軍情與穆圖善妥籌調派雷正綰張集馨另奏軍餉萬分支絀請將部准新疆贖罪章程量爲變通酌減銀數以濟要需一摺雷正綰等營餉項異常支絀自屬實在情形前經奏准已未到戌各官犯文武贖罪銀兩數目奉文已屆半年尙無一人捐贖該提督等以銀數仍鉅各官犯力量未必盡寬

是以雖有贖罪之條並無濟餉之實請照籌餉事例分別已未到
戊銀數覈減五成定以呈限半年銀限一年以奉到部文之日起
限不准展緩他省不得援以爲例其中如情節較輕者捐贖後准
回旗籍如情節稍重者捐贖後由流減徒改發軍臺呈繳三年臺
費方准釋回旗籍等語著卽照所請行其有情節甚重者仍著隨
時奏請辦理以示區別本日又據劉蓉奏副將顏明亮押解餉銀
五百兩行抵城固縣被勇丁劉占洪劫去餉銀將顏明亮殺死等
情劉占洪係曹克忠部下副新中後兩營勇丁膽敢劫奪餉銀殺
斃副將大員實屬罪大惡極著都興阿雷正綰等飭令曹克忠迅
將該犯劉占洪嚴拏解劉蓉歸案審辦盡法懲治毋任漏網將此
由六百里諭知都興阿穆圖善雷正綰並傳諭張集馨知之○丙
寅諭議政王軍機大臣等保恆惠慶奏逆回勢益猖獗分股上竄

請飭大兵出關剿辦文祺奏撲滅巴里坤逆回並坤郡勸捐糧石籌辦城防各摺片回逆自攻陷迪化後分陷綏來南北兩城庫爾喀喇烏蘇城垣亦於九月二十九日失守並有欲犯伊犁之謠庫爾喀喇烏蘇與伊犁僅隔精河伊犁爲新疆總會重地設有疏虞邊陲大局何堪設想著明緒督飭在事員弁認真堵遏毋令賊氛紛竄所屬各城並須鎮靜彈壓嚴密防守以固藩籬其駐紮濟木薩一帶蒙古旗綠各兵勇著保恆惠慶飭令勤加訓練以備進剿並將南山與吐魯番相通之處一帶隘口嚴密防堵以防賊匪乘虛竄入庫爾喀喇烏蘇失守詳細情形及該城員弁並武隆額下落著保恆等查明具奏前因該城大臣等屢有先撫後剿之奏朝廷正慮回眾居心狡詐反覆堪虞此次武隆額因與賊匪講和受其愚弄兵敗不知何往以帶兵大員甘爲逆回所紿喪師損威殊

堪憤懣嗣後保恆等務須嚴飭各城帶兵員弁一意堵剿毋得再言撫議致蹈從前覆轍見在甘省軍務大有起色都興阿等已分三路進兵俟辦理就緒卽當分撥勁旅出關以張捷伐援兵未到之先明緒保恆均當慎重固守以免疏虞巴里坤回匪變亂滿漢官兵民勇卽時撲滅辦理尙屬安速著文祺會同扎克當阿郡王伯錫爾並咨色普詩新督飭在事員弁技捕餘匪以淨根株巴里坤民勇及公局人員於回匪釀亂之時奮力殺賊並捐助糧石以濟兵食尙屬出力著文祺查明請獎毋許冒濫將此由六百里各諭令知之○申諭四川等省迅解新疆軍餉○丁卯諭內閣滿慶等奏請派青饒汪曲辦理商上事務一摺汪曲結布因病出缺無人辦理達賴喇嘛商上事務查羅布藏青饒汪曲人甚明白辦事謹慎爲合藏僧眾素所推服若令該喇嘛辦理商上事務實於藏

中事務有裨著照所請卽著青饒汪曲敬謹辦理工商上一切事務並賞給諾門罕名號達賴喇嘛見在年幼該喇嘛務當留心妥爲照料俟遇便再行頒給敕書○諭議政王軍機大臣等滿慶恩慶奏汪曲結布病故商眾公舉僧人代理一摺藏中事務緊要必須得人辦理羅布藏青饒汪曲旣據僧俗大眾稱其深通黃教並曉公事卽著滿慶等將本日清字諭旨二道宣示令其感激恩施勤慎辦公務協輿論儻能始終奮勉僧俗永遠相安將來必當錫以名號准其轉世以獎勤勞如始勤終怠不愜厥情致藏地未能綏靖朝廷洞燭萬里必將該諾們罕治罪原保之人亦豈能辭咎耶福濟景紋行抵雅州何以迄今尙未赴藏此時打箭鎗至乍察一帶設站事宜聞已辦理就緒卽著福濟景紋刻日起程迅速入藏毋許再有逗遛致干重咎羅布藏青饒汪曲協理工商上事務能否

得力並著到藏後隨時察看據實具奏毋稍徇隱將此各諭令知之尋奏遵查新派掌辦商上事務諸們罕羅布藏青饒汪曲老成持重素爲合藏僧俗敬禮藏地底定僧俗相安報聞○是月豁免江蘇上元等七縣被擾同治四年五年六年額賦蠲緩山東濟甯等七十五州縣東昌等五衛被水被旱被蟲被災新舊額賦暨租課原借籽種口糧緩徵陝西府谷縣雹災下忙額賦